

Israel se verbondsgeskiedenis

Genesis

Waaroor gaan die boek Genesis?

- Die boek bestaan eintlik uit twee dele.
- Genesis 1 – 11 verduidelik iets oor die wêreld waarin ons leef.
 - Dit vertel dat God alles gemaak het, en dit vertel ook iets van die eerste mense.
 - Dit vertel van Noag en hoe God hom en al die diere in die ark beskerm het.
- Genesis 12 – 50 vertel die begin van die verhaal van die Israeliete, God se volk.
 - Dit vertel van Abraham, Isak en Jakob, en van Jakob se twaalf seuns.
 - Dit vertel ook hoe Josef in Egipte beland het en hoe sy hele familie later in Egipte gaan woon het.

Belangrik om te weet

- Lees die eerste drie woorde van Genesis. Nou weet jy wat die woord Genesis beteken!
- Dit gaan oor die begin. Ons sien dat alles by God begin.
- Dit gaan oor die begin van die hele wêreld (Genesis 1 – 11), en ook oor die begin van God se volk (Genesis 12 – 50).
- Dit vertel ons ook hoekom God ons gemaak het (Genesis 1:27).

Belangrike karakters

- Die eerste mense, Adam en Eva, en hulle nageslag.
- Noag en sy familie.
- Abraham, Sara en Lot.
- Isak en Rebekka en hulle tweeling Jakob en Esau.
- Jakob se twaalf seuns en een dogter.
- Josef, die Ismaeliete, Potifar en sy vrou, die bakker, die skinker en die farao.



Genesis



God se skeppingswerk

1 In die begin het God die hemel en die aarde geskep. ²Die aarde was heeltemal onbewoonbaar, dit was donker op die diep waters, maar die Gees van God het oor die waters gesweef.

³Toe het God gesê: “Laat daar lig wees!”
En daar was lig.

⁴God het gesien die lig is goed, en Hy het die lig en die donker van mekaar geskei. ⁵God het die lig toe “dag” genoem, en die donker het Hy “nag” genoem. Dit het aand geword en dit het môre geword. Dit was die eerste dag.

⁶Toe het God gesê: “Laat daar ’n gewelf wees tussen die waters om die waters van mekaar te skei.”

⁷So het dit gebeur.

God het die gewelf gemaak en die waters onder die gewelf geskei van die waters bo die gewelf. ⁸God het die gewelf “hemel” genoem. Dit het aand geword en dit het môre geword. Dit was die tweede dag.

⁹Toe het God gesê: “Laat die waters onder die hemel op een plek bymekaarkom sodat die droë grond sigbaar word.”

So het dit gebeur.

¹⁰God het die droë grond “aarde” genoem, en die waters wat bymekaargekom het, het Hy “see” genoem. En God het gesien dit is goed.

¹¹Toe het God gesê: “Laat daar uit die aarde groenigheid voortkom, groen plante wat saad gee en vrugtebome op die aarde, wat elkeen na sy aard vrugte dra en waarvan die saad in sy vrug sit.”


So het dit gebeur.

¹²Die aarde het groen plante laat uitspruit wat elkeen na sy aard saad gee, en bome wat vrugte dra met die saad daarin, elkeen na sy aard. En God het gesien dit is goed. ¹³Dit het aand geword en dit het môre geword. Dit was die derde dag.

¹⁴Toe het God gesê: “Laat daar ligte wees aan die hemelgewelf om dag en nag van mekaar te skei. Hulle moet ook as tekens dien om seisoene, dae en jare aan te dui. ¹⁵Hulle moet ligte wees aan die hemelgewelf om op die aarde lig te gee.”

So het dit gebeur.

¹⁶God het die twee groot ligte gemaak, die grootste om bedags te heers en die kleiner lig om snags te heers, en ook die sterre. ¹⁷God het hulle in die hemelgewelf geplaas om op die aarde lig te gee, ¹⁸om oor dag en nag te heers en om lig en donker van mekaar te skei. En God het gesien dit is goed.



Genesis 1



Speel **Samie** se snelvuurspeletjie. Lees Genesis 1. Maak nou ’n lys van alles wat God gemaak het. Elkeen kies een daarvan en kyk dan hoeveel verskillende soorte van daardie ding jy in een minuut kan opnoem. As jy “diere” kies, noem jy verskillende soorte diere. As jy “hemel” gekies het, noem jy alles wat ’n mens in die hemelruim kry. As julle wil, kan julle ’n tydhouer en ’n teller aanstel. Die tydhouer sê wanneer een minuut verby is. Die teller tel hoeveel dinge elkeen kan opnoem.

Sê dan almal saam vir God dankie vir die wonderlike wêreld wat Hy gemaak het.

¹⁹Dit het aand geword en dit het môre geword. Dit was die vierde dag.

²⁰Toe het God gesê: “Laat die waters krioel van lewende wesens, en laat daar voëls onder die hemelgewelf oor die aarde vlieg.”

²¹God het die groot seediëre geskep en al die ander lewende wesens waarvan die waters krioel, almal na hulle aard; ook al die voëls na hulle aard. En God het gesien dit is goed.

²²Toe het God hulle geseën: “Wees vrugbaar, word baie en bewoon al die waters van die see. En laat die voëls baie word op land.”

²³Dit het aand geword en dit het môre geword. Dit was die vyfde dag.

²⁴Toe het God gesê: “Laat die aarde lewende wesens voortbring, elkeen na sy aard: mak diere, diere wat kruip, wilde diere, elkeen na sy aard.”

So het dit gebeur.

²⁵God het die wilde diere op die aarde gemaak, elkeen na sy aard; ook die mak diere, elkeen na sy aard; en ook al die diere wat kruip, elkeen na sy aard. En God het gesien dit is goed.

²⁶Toe het God gesê: “Kom Ons maak die mens as ons verteenwoordiger, ons beeld, sodat hy kan heers oor die vis in die see, die voëls in die lug, die mak diere, die wilde diere en al die diere wat op die aarde kruip.”

²⁷God het die mens geskep as sy verteenwoordiger, as beeld van God het Hy die mens geskep, man en vrou het Hy hulle geskep.

²⁸Toe het God hulle geseën en vir hulle gesê: “Wees vrugbaar, word baie, bewoon die aarde en bewerk dit. Heers oor die vis in die see, oor die voëls in die lug, oor al die diere van die aarde, ook oor die diere wat op die aarde kruip.”

²⁹Verder het God gesê: “Let op! Ek gee aan julle al die plante wat saad gee op die hele aarde; ook al die bome wat vrugte dra en saad gee. Dit sal julle kos wees.”³⁰Maar aan die wilde diere op die aarde en aan die voëls in die lug en aan die diere wat op die aarde kruip, aan alles wat leef, gee Ek al die groen plante as kos.”

So het dit gebeur.

³¹Toe het God gekyk na alles wat Hy gemaak het, en dit was baie goed. Dit het aand geword en dit het môre geword. Dit was die sesde dag.

2 Die hemel en alles daarin is voltooi en ook die aarde en alles daarop.² Op die sewende dag was God reeds klaar met die skeppingswerk en het Hy gerus na al die werk wat Hy gedoen het.³ Hy het die sewende dag as gereelde rusdag geheilig, want op daardie dag het Hy gerus na al die skeppingswerk wat Hy gedoen het.

⁴Dit dan is die geskiedenis van die hemel en die aarde toe hulle geskep is.

Die mens in die tuin

Toe die Here God die aarde en die hemel gemaak het,⁵ was daar nog nie enige struik op die aarde nie en het daar ook nog nie enige groenigheid opgeskiet nie, want die Here God het dit nog nie op die aarde laat reën nie, en daar was nog nie 'n mens om die grond te bewerk nie.⁶ Daar het water uit die aarde uit opgekom en al die grond nat gemaak.⁷ Die Here God het toe die mens gevorm uit stof van die aarde en lewensasem in sy neus geblaas, sodat die mens 'n lewende wese geword het.

⁸Die Here God het toe 'n tuin in Eden in die ooste aangelê en die mens wat Hy gevorm het, daar laat woon.⁹ Die Here God het verder allerlei bome, mooi om na te kyk en lekker om van te eet, uit die grond laat uitspruit, ook die boom van die lewe in die middel van die tuin, en die boom van alle kennis.

¹⁰Daar het 'n rivier in Eden ontspring om die tuin nat te maak, en van daar af het dit verdeel en vier riviere geword.¹¹ Die eerste rivier is die Pison en dit loop rondom die

